

تاریخ عثمانی انجمنی

۱ تشرین اول
۱۳۳۰

پنجمی سنه
نومبر ۲۸

مجموعہ سی

حسنکف ایوبیه حکومتی

(یکرمی آلتنجی نسخه دن مابعد)

حسنکف ایوبیه حکومتی ، مشرق سماعتدن طلوع ایتش بر شمس تابان کجالات اولان ابوالمظفر سلطان صلاح الدین یوسف ایوبی حضرتلرینک مصر ، طرابلس غرب ، نوبه ، سودان ، یمن ، حجاز ، سوریه ، حلب ، اورفه ، میافارقین ، اخلاط ودها سائر بعضی ممالکده تشکیلنه موفق اولدقلری حکومت ایوبیه نیک الکی زیاده امتداد ایدن برشبهه سی در .

بوشبهه نیک نه صورتله تأسس ویاوز سلطان سلیم خان حضرتلرینک عهد سلطنتلرینه قدر نه صورتله محافظه موجودیت ایلدیکلی کلاشلیق ایچون مبادی سلسله شتونه ارجاع نظر ایلک لازمدره . کرچه بو حکومت تشکیلنه صلاح الدین یوسف حضرتلری کبی برداهی سیاسی موفق اولمشلر ایهده - دولت ایوبیه عنوانیه مشهور جهان اولمسنه و ذاتاً پدرلری نجم الدین ایوب ایله عمجه لری اسد الدین شیرکوه بو حکومتک مستحضرات اساسیه سنی تهیه و آماده ایلدکلی کبی سلطان صلاح الدین حضرتلرندن صکره نائل حکومت اولانلرک حزب قلیلی سلطان صلاح الدینک اولادی اولوب متبایسی بالخاصه نجم الدین ایوبک و برقمیده اسد الدین شیرکوهک اولاد واحفادی بولمیلرینه بناء روح الاساس تشکلات کلاشلیق ایچون اول امرده سلطان صلاح الدینک پدری نجم الدین ایوب ایله عمجه لری اسد الدین شیرکوهک هویت ذاتیه و سلسله لرندن بحث اولنور .

امیر نجم الدین ایوب

پدرینک اسمی شادی در . آذربایجان قطعه سنده واقع دوین شهری

متینانندن وروادیہ اکرادندندر . روادیہ طائفہ سیدہ اکرادک ہذا نیہ
قبیلہ کبیرہ سندن بر بطن در .

شاذی نک پدری حقندہ صلاح الدین نامہ لک بمضیلرندہ سکوت
وبعضی سندن مروان اولدینی قید اولنہ یور .

علامہ ابن خلکان حضرتلری بیوررلرکہ شاذی نک نسبی حقندہ
چوق کتابلر تتبع ایتدم وحتی نجم الدین ایوبک واسد الدین شیرکوکھک
وقف ایلدکلری خیراتک وقفنامہ لرینہ دہ مراجعت ایلدیم . ایوب بن
شاذی وشیرکوکہ بن شاذی تمیرلرندن بشقہ برشی بولہ مدم . لکن کبراء
خاندانلرندن بعضیلری شاذی نک پدری اسنک « مروان » اولدینتی
بکا سونلایلر .

بنہ ابن خلکان دیرکہ استادم قاضی بہاء الدین ابن شداد بکا دیدی کہ
سلسلہ ایوبیہ نک ملوک امویہ بہ اتصالی بعضیلرندن ایشتمککم اوزرینہ
بالذات سلطان صلاح الدین حضرتلرینہ مراجعت وسؤال ایلدیکمدہ
اصلی اولدینتی بیان ایتدی .

کتاب مدرج صاحبی حسن بن غریب بن عمران الحرمس - کہ صلاح الدین
ایوبی حضرتلرینک برادر زادہ سی الملک المعظم شرف الدین عیسی
ایلہ سائر بعض خاندان ایوبی نک ۶۱۹ سنہ سنہ قدر استادیلرندہ بولمیش
ایدی - کتابندہ سلسلہ ایوبیہ بی فخر عالم افندمن حضرتلرینک بکرمی
بشعبی بطندہ جد رسالہ پناہیلری بولنان مضرا بن تزارہ ایصال ایدیور
وبوسلسلہ واسطندہ بولنان علی بن احمد بن علی بن عبدالعزیز نام ذاتی دہ
« خراسانی » لقبیلہ معروف اولوب شاعر مشہور متنبی نک ممدوحی
اولدینتی بالیان متنبی نک آنک حقندہ انشاد ایلدیکی بعض اشعارینی
ذکر ایدیور .

ابن خلکان حضرتلری « وفیات الاعیان » دہ وعلامہ عینی حضر -

تاری ده « عقودالجمان » ده اختلاف سلسله نسبیری بیان صره سنده
 بوسلسله بی ذکر وتعداد ایدیور . والله اعلم
 نجم الدین ایوب بشنچی عصر هجری او اخرنده دوین ده دنیایه
 کیشدر . زمانده متداول اولان قنونده وبالخاصه جنکاورلک و سلحشورلق
 خصوصاً صرلنده احراز ید طولای ایشدی .

نجم الدین ایوب هرشیدن زیاده جنکاورلک ارکان مهمه سندن اولان
 طوب او یوننه صراق ایشدی بومهم او یون اوچ صورتله او یونایوردی .
 برنجیسی آت اوزرنده چوکان ایله ایکنجیسی پیاده اوله رق ینه
 چوکان ایله اوچنجی پیاده اوله رق ال و آفاق ایله او یونایردی .
 نجم الدین ایوب ، او یونی بر مرتبه جسورانه او یونایردی که خصمایه
 انشای هجومده قارشیسنده اجل هائل نجم ایتسه دوغمز و اوزرینه
 هجوم ایدن رستم زمان اولسه موقعی ترک ایتزدی . علامه ابن ابی شامه
 حضرتلری بیوردرلرکه ، نجم الدین طوب او یوننه کیردیکی زمان مهابلته
 هجوم قطمینی کورنر مطلقاً بر بلایه او غر ایوب کیر و دونه میه جکته
 حکم ایدرلردی . لکن نجم الدین ایوب بعضاً ییلان کی آتک قارنک
 آلتنه کیر و بعضاً بره فرلایه رق دشمنک تهلکلی هجوملرینه قارش
 کندیسنی دها بیوک تهلکیه القا ایتش ایکن بوتهلک لک جله سنی کیرر
 و خصمانی مغلوب ایدرک ینه سالماعودت ایلر و بوقدر تهلک لری اتلایه رق
 سلامتله عودت ایتدیکنه هر کس کال تحسین ایله تمجب ایدردی .

شوراسنی شمیدن سوبلیه لم که نجم الدین ایوبک سنی یتشه متقارب
 اولدقدن و مخدومی صلاح الدین یوسفک فائل تخت و تاج اولمش مختیارلقی
 کوردکدن صکره ینه طوب او یوننه دوام ایلدیکی صره ده آندن دوشه رک
 وفات ایتشد .

نجم الدین ایوبک سنی یکیتمک چاغنه واصل اولدقده جنکاورلک
 و سلحشورلقده نوادر دنیادن اولمش و آرتق دوین ساحه لری علوشجاعت

طار کلکده بولنش ایدی . کوچک برادری اسدالدین شیرکوه - وعلی
روایه پردی شادی ده - برلکده اولدینی حالده دارالخلافه اسلامیان
اولان بغداده عزیمت ایدرک خدمت عسکریه داخل اولدی . مشارالیهده
کورولن خارق العاده آثار شجاعت ونور فراست وزیر مجاهدالدین بهروزک
نظر دقت وتقديرینی جلب ایلدی .

اول اشناده وزیر مجاهدالدینک مقاطعه سندن اولان تکریت
حوالیسندمه برچوق سرکشان وقطاع طریق توره مش ایدی . والیلکنی
اداره ایدمه جک نجم الدین ایوبدن ده مناسب کیمسه بولنه میه جفتدن
تکریت والیلکی عهد کفایتنه توجیه اولندی . [۱] برادری شیرکوه
ایله برلکده عزیمت ایدرک اولحوالی بی جلوه گاه ایدن اشقیانک کوکنی
کشمش ونعمت استراحتدن محروم قالان اهانلینک یوزینی کولدرمشدر .
اهانلینک نجم الدینه اولان محبتی ونجم الدینک ده تکریتی سومسی حسیه
دوینده کی اقربا و متعلقاتی جلب ایدرک اوراده توطن ایتمه قرار ویردی .
۵۲۶ سنه سنده موصل حکمداری عمادالدین زنگی بغداد اوزرینه

یورویه رک شهره قدر کلش ایسه ده بغدادک قبولری اوکنده واقع اولان
خوزریزانه محاربه ده عسکری فنا حالده مغلوب و پریشان و کندی بی برق
یرندن مجروح اولدینی حالده مجبور کریزان اوله رق تکریت جوارینه
کلدی . نجم الدین ایوب مردانه لک حراسمنی بالاجرا عمادالدین زنگی بی
استقبال ایدرک قلعه ایچنه کتیرمش و اون بش کون قدر جریحه لری
تداوی ایتدرمش و دجله بی عبور ایچون کیلر تدارک ایدوب ممنوناً و مطیاً
موصل جاقنه کچیرمشدر .

نجم الدین ایوب سیاسی و اداری ایشارده بو صورته ابراز کیاست
ایلدیکی کبی حکما و علما و ادبا ایله صحبت و معاشرت ایتمه کله حائر حظ

[۱] بعضی تاریخلرده اول امرده پردی شادی تکریت عافظ لکنه تعیین اوله ورق
آنک اوراده و طائندن صکره نجم الدین ایوبک تعیین اولنسی روایتی ده وارد .

عظیم اولوردی . بو قیلدن اولق اوزره فضلاي مشهوردن ابوالفرج
عمادالدین اصفهانی تک عمجه سی اولان مولانا احمد بن حامدی سلطان
محمود بن محمد بن ملک شاه تکریت قلعه سنه حبس ایلدیکندن مشارالیه
عمادالدین اصفهانی ده تکریته کلش و بو ذات فاضلک ورودنی نجم الدین
ایوب بر نعمت عد ایدوب کیجه و کوندوز یانندن آرمیه رق اخوت پیدا
ایلش و مخدومی صلاح الدین حقنه اون ایکی بیوک جلد اوزرینه د البرق
الشمسی د کبی بر تاریخ بی نظیری یازان او یله بر علامه یکتایی ده
اوزماندن حاضرله مقدمه بولنش ایدی .

۵۳۲ سنه سنده بر بادره ناکه ظهور نجم الدین ابوبک تکریت
والیکنندن عزلی انتاج ایلدی شویله که تکریت قلعه سندن خارجه
چیقان بعضی قادینلرک عودتلرنده وزیر مجاهد الدین بهروزک قلعه ده
بولتان آدملرندن بری بر قادینه تعرضه بولنش ایدی . نجم الدین ایل
شیرکوه برلکده اولدقلری بر صرعه قادین کلوب شکایت ایلدی .
اسد الدین شیرکوه هان حربه سی اله آله رق کیمش و حریف مرقومی
قتل ایدرک قلعه دن اشاغی به آتمشدر . نجم الدین برادرینک شو
محاسرتی اوزرینه وقوع حالی مجاهد الدین بهروزه بیلدردی . بو حاله
اولجه عماد الدین زنگی به ایدیلن ماونت انضمام ایدرک هیچ بر معذرت
باقلمق سزین مجاهد الدین در حال نجم الدینی عزل و قلعه دن اخراج اولمقرخی
امرایتدی .

نجم الدین ابوب برادر و سائر متعلقاتیه برابر موصل حکمداری
عماد الدین زنگی جانبیه توجه ایلدی . عماد الدین زنگی بویله ایکی برادر
نامداره نائل اولدیشدن طولای پک ممنون اولش و خصوصیه خدمت
مسبوقه لرینی در خاطر ایدرک بیوک التفاتله مستغرق ایشدر .

مشار الیه مانک ورودلرخی متعاقب یمین و یسارنده ایکی برادر شیردل
اولدینی حالده شهر زور اوزرینه یورومش و شهر مذکورک زور بازو ایل

ضبط اولنمسی اوزربنه نجم الدین ایوبه توجیه اولنمشدر . اندن صوکره
عمادالدین زنکی تحویل وجهه عزیمت ایدرک حلب و سوریه . حوالیسنه
هجومه باشلامش و هر محاربه ده ایکی برادرک مطلقا شجاعت خارقه لری ساحه
آرای ظهور اولدیفندن عمادالدین زنکی نك کیندکجه بمنوینی آرتمشدر .

۵۳۴ سنه سنده بعلبک حصن حصینی فتح و تسخیر اولندقدن موقعک
اهمیتی و سوریه قطعه سنک کلیدی مقامنده بولنمق حسیله نجم الدین ایوب
والبکنه تعیین اولندی . بعلبک ده سکر سنه مقداری ایفای حسن خدمته
وبعض خیراته موقوف اولمش و بوجه دن مشاغل صوفیونه مخصوص اولمق اوزره
نجیه خانقاه لطیفی انشا ایلشدر .

۵۴۱ سنه سنده عمادالدین زنکی جعفر قلعه سی محاصره ایلدیکی اثناده
غلاملاردن برنا خلف مشارالیهی شهید ایلدیکندن اورتله نك قارشقلنی
و موصل حکمداری ملک سیف الدین دن واقع اولان استمدادن
بر نتیجه حاصل اولماسی اوزربنه بر جوق محاربه و مقاتله دن صکره
قلعه بی صاحب قدیمی ملک بحیرالدین تسلیم ایدرک شهر شامه چکلمش
و ملک مشار الیه کندیننه مکمل مقاطعه لر و چفتلکلر اعطا ایدرک
اکا برامراسی سلکنه ادخال ایلشدر لکن اهل صلیبک شهر شهر
شامی تحت تهدیده آلیری نجم الدینی بک بی حضور ایتمش و بحیرالدین ده
آرزو ایلدیکی معالی کفایتی کوره مدیکندن متأثر اولمشدر . اول اثناده
محمود نورالدین ابن عمادالدین شهیدک کوکب اقبالی تلمع ایدرک واسدالدین
شیرکوه ایسه آنک میتندنه بولندیقندن سلطان نورالدین و امیر اسدالدین
ایله محاربه و شامده اقامت ایتکی ده حیثته صفدره مدیفندن اکثر
اوقات بعلبکده بکیرمه باشلامشدر .

۵۴۶ سنه سنده بعلبکده بولندیقی اثناده اهل صلیب او حوالی بی
یغما ایدرک بعلبک جواریننه قدر کلدیکندن بعلبکده بولنان بر مقدار
شام عسکر یله کندی آدم لیری مخدومی شمس الدوله تورانشاهه ترفیق
ایدرک اهل صلیبک تعیننه کوندردی .

اهل صليب ايسه شدتلی برقار تی سنه طوتیلوب یوللرینی شاشرمش اولدقلری ائشاده شمس الدوله یلدریم کبی یتشدی . منهوبات تماماً استرداد اولدقدن بشقه اهل صلیک قسم اعظمی قلعیدن کچیرلدی .

۵۴۹ سنه سنده دمشق فتح وتسخیری امرنده نجم الدین ایوبک خدمت وهتی ظهوره کلمکه سلطان نورالدین محمود ، پدر والاشانک برکزاری اولان بو ذات وفاکاره پک چوق التفات ایدرک مخدومی توارنشاھی شام والیلمکنه تمین ایلدی .

حکمدار سابق مجیرالدین طرفندن بملیک والیمی بولنان ضحاکه سلطان نورالدین قلعه تک تسلیمی حقنده هر تقدیر نوازشکارانه مکتوبلر یازمش ايسه ده تسلیم ایتامش وشامک اطرافنده کی اهل صلیبی براقوب بملیکه هجوم ایتیمکده موافق کورمدیکندن بو خصوصی نجم الدین ایوبک رأیته تفویض ایلشدی . نجم الدین درحال کندی آدملریله بملیکه عزیمت وآنی کورن بملیک اسرا واشرافی بلامقاومت قبولری آچهرق قلعه یی تسلیم ایلشدر . آندن سکرده ده سلطان نورالدینک واقع اولان محارباتنده یا کندیلری ویا اولاد واحفادنن بمضیلری بهمه حال بولنور وبرچوق یوز آقلقلرینه سبب اولورلردی .

۵۶۲ سنه سنده اوتوز سنه دنبری مشتاق اولدینی ادیب بی نظیر عمادالدین ابوالفرج اصفهانی شامه کله رک جناب نجم الدینه مسافر اولدی . مسافرینی سلطان نورالدین محموده تقدیم ایدرک مستغرق اعزاز شهریاری ایلدی . عمادالدینک ورودینی اولوقت مصرده بولنان برادری اسدالدین ومخدومی نورالدینه ده تبشیر ایدرک مشارالیه عمادالدینه بر چوق مصر هدیه لری کلدی .

علامه ابن ابی شامه حضرتلری بیوررلرکه نزد پادشاهیده امیر نجم الدین ایوبی تک عظمت قدر وشانی بر مرتبه یه وارمش ایدی که اوسلطان مهییک حضورنده عموم وزرا وامرادن بر فرد امر شاهانه لری شرفریز صدور

اولمینجہ قعودہ مقتدر اولمدقلمی حالہ جناب نجم الدین ایوب ہرنہ زمان کلیرسہ بلا استیذان اوطورر وایستدیکی ہرشیشی عرض ایدردی . بوتوقیر ممتازہ سلطان نورالدین شہیدک مدت سلطنتندہ وزرا وامرادن بر فرد نائل اولہ مامشدی .

۵۶۵ سنہ سندہ مصر دہ وزیر اولان صلاح الدین ، سلطان نورالدین محموددن استرحام ایدرک پدری نجم الدین ایوب ایلہ سائر اقربا وتعلقاتی مصرہ جلب ایلدی . مصر دہ خلیفہ بولنان عاضد باللہ بالذات استقبالنہ چیقیدی و مخدومی یوسف صلاح الدین دہ وزارتی تکلیف ایلدی . نجم الدین ایوب اولادینک کوزلردن اوپدرک شونطق مختصرلہ بسط معذرت ایلدی :
« اوغلم ؛ اللہ عظیم الشان سنی بومصلحتک اہلی اولدوغک ایچون اختیار ، بومرتبہ بی سکا احسان ایلدی . بومسندہ سن لایقسین اللہ سکامبارک ایقسین . »

۵۶۷ سنہ سندہ خلیفہ عاضدک وفاتی اوزرینہ نجم الدین ایوب مخدومی صلاح الدین یوسفک تاج و تخت سلطنتی احراز ایلدیکنی دہ کوردہ رک قرین العین افتخار اولدی . ۵۶۸ سنہ سندہ مخدوماری صلاح الدین ، شوبک و کرک قلعلری فتوحانندہ بولندیغی اثنادہ سنہ مذکورہ ذی الحجہ سنک اون سکنزنجی بازار ابرتسی کونی برمستاد طوپ اوپوننہ عزیمت ایتمش واواثنادہ آتدن دوشہ رک برہفتہ صکرہ رحمت رحمانہ انتقال ایلشدر . اول امر دہ صرای سلطانی دہ برادری اسد الدین شیر کوہک جنبہ دفن وبعده ہراییکی برادرک جسدری مدینہ منورہ بہ نقل اولنہ رق رسول اللہ صلی اہ علیہ وسلم افندمن حضرت تلبینک جوار رسالت پناہلرندہ دفین خاک غفران اولمشدر .

مشارالہ اخلاق وفضائل عالیہ سیلہ برابر صاحب خیرات وحسانت اولدیفندن سوریدہ بعض آثار خیرہ سی اولدقدن بشقہ مصرہ ورودیلہ وفاتی مدتی آز برزمان اولدیغی حالہ آندہ دخی بعض خیرات وحسانت

براقشدر . مصرده خارج باب النصرده اولان مسجد شریف و حوض لطیف بوجه دندر ابن خلکان حضرتلری بیوررلرکه ، بن کیدوب فوق جدارده بولنان مهرم اوزریده کی تاریخی اوقودم ۵۶۶ سنه سی محرردر . مشارالیه نجم الدین ایوبک عالم سیاستده دخی نصل کمبی عالی ذواتدن اولدیننی کوسترمک و حقنده وسیله رحمت اولق اوزره شو فقره نك درجیه اکتفا ایلرز . ۵۶۷ سنه مننده خلیفه عاضدک وفاتی اوزرینه سلطان صلاح الدین ظاهرده سلطان نورالدین محمود طرفندن نیابة مصری ضبط ایتمش ایسده حقیقته احراز سلطنت ایتمشیدی . سلطان نورالدین کندیننی محاربه وسیله سیله بعضی موافقه دعوت ایدر و صلاح الدین ایسه عزیمت ایدر کی کوروندیکی حالده بعضی محاذیر عرض ایدرک تأخیر عزیمت ایلردی .

نورالدین ، صلاح الدینک شو وضعندن دلکیر اولدینندن عسکرله مصره واروب مشارالیهی مصردن اخراج ایلمک نیت ایلدی . صلاح الدین سلطان نورالدینک نیت وعزمندن آگاه اولدقده امرا و اقرباسنی جمع ایدوب سلطان نورالدین مصره کلککه قرار ویرمش ، شمدی بوکا نه چاره ایدلم دیدکده جمله سی خاموش اولدی . یالکیز صلاح الدینک برادر زاده سی نقی الدین عمر ابن شاهنشاه ابن نجم الدین ایوب . حدثله فک دهان ایدرک : اکر اتابک عسکر چکوب اوستمزه کلیرسه بزده عسکر منی جمع ایدوب مشارالیه ایله حرب ایدرز دیدی . حضارک جمله سی بورایه موافقت ایدوب مادامکه حیاته یز هر بریمز مال و جانمزله بویولده سی ایدرز دیدیلر . مجلسده حاضر بولنان نجم الدین ایوب حقیقینک شوسوزندن و امراتک صورت موافقت کوسترمسندن غضبه کلوب « ای نابکارلر بونه تدبیردرکه حجاب ایتمدن سویلر سز صوصکنز » دیدی . بعده صلاح الدینه شویله جه توجیه خطاب ایلدی : « ای اوغول بوقوم ایچننده سنی بندن زیاده اسرکه یوب خیرخواهک اولور کیمسه وارمیدر » دیدی . « بوقدر » جوابنی

آلنجه: «ایمدی معلومک اولسونکه بزر سلطان نورالدینک قولى بزه جمیع امرینه بیک جان ایله اطاعت ایدرز. اگر سنک قتلکی فرمان ایدرسه ابتدا بن سنک باشکی کسرم بن بویه اولدقدن صکره ارتق سن کیمه اعتماد ایدوب مخالفت سودانده اولورسین. سلطان نورالدین جمله مزک افندیسی وولی نعمتی در. عسکر طائفه سندن کیمک جانی واردرکه نورالدینی کوزدکده آتندن اینوب پیشکاهنده یراویمه. جمیع بلاد کنندی مملکتیدر. سنی طرفندن بودیاره والی ایلمش ایکن شمدی عزل ایتمک مراد ایلدکده بالذات کنندیسی عسکر ایله حرکت ایلمکه نه حاجت. فرمان شاهانه لرینی مستصجابا مرهانکی قولى کلورسه بزمملکتی آکا تسلیم ایدوب چبقار کیدرز یریکزه کیمی ایسترسه آانی نصب ایلسون، امر و فرمان سلطان مشارالیه حضرتلرینکدر، دیدی. و مجلس مشاوره به کلنلرک جمله سی بوکلام قاطع اوزرینه متفرق اولدیلر. مخدومی صلاح الدین ایله تنها قالدقده دیدی که:

«اوغلم سنک حالاً تجربیه ک نقصان ایتمش. بونک کبی عمومی برجمیتده درونکده مضمر اولان اسراری نیچون افشا ایدیورسین. سلطان نورالدین سنک شو عزیمکه آگاه اولدقده جمیع مصلحتی ترک ایدرک بتون همت و قوتی بو طرفه صرف ایدر. لشکر بی پایان ایله کلدکده جمله عسکر آنک طرفه میل ایلر. سنی طوتارلر ال وایاغکنز باغلی اوله رق سلطان مشارالیه تسلیم ایدرلر. اما شمدی بنم شوسوزلرمی نیجه کیمسه لر کیزلیجه مشارالیه یارارلر سلطان نورالدین مره درر عالیجنابدر بوسوزلردن ممنون اولور. همان سنده بومضمونده یعنی بوقوللرینی تأدیب ایچون بو طرفه عسکرله توجه ایلمکه نه حاجت مرهانکی قولکیزی کوندررسه کز بن کنندی الله کردنمه ایپ طاقار خاکپای ولی نعمیلرینه واریرم باقی امر و فرمان مزکدر مألنده مؤثر بر ضراعتنامه ارسال ایله عبودیتیز معلومی اولدقده بو طرفه کلکدن اعراض ایدر سائر مصالحنه

مشغول اولور . برمدتن صوکره عالم نیجه اوله جغنی کیم بیلیر « دیدی .
 صلاح الدین پدر مبارکنک اللریخی اوپه رک رأی منورینی تحسین ایلدی .
 سلطان نورالدینه ذکر اولسان مضمونده مکتوب کوندردی . پدر
 عالییرینک دیدیکی کبی ارتق مصر طرفه توجهدن اعراض ایدوب کندی
 حانه مشغول اولدی . چوق کچمکسزین یعنی ۵۶۹ سنه سنده سلطان
 نورالدین عازم دارالقرار اولغله بوندن صکره مانع ومزاحم برطرف
 اولوب سلطان صلاح الدین استقلال اوزره شهریار کامکار اولدی .
 اشته شوعالیجناب پدردرکه سلطان صلاح الدین کبی شهرتی جهانکبر
 اولان برمخدوم بی نظیر یتشدیردی .
 رحمة لله علیه

(مابعدی وار)

علی امیری